

Prot. 874/86



CONGREGATIO PRO EPISCOPIS

MELPHICTENSIS, IUVENACENSIS  
TERLITIENSIS ET RUBENSIS

DE PLENA DIOECESIVM UNIONE

### DECRETUM

Instantibus votis obsecundans Concilii Oecumenici Vaticani II quod attinet ad aptiorem circumscriptionum ecclesiarum compositionem (cf. C.D. 22-23), Congregatio pro Episcopis — quae sub Ioannis XXIII fel. rec. Pontificatu, eius directoriis normis ducta, huiusmodi quaestionis studium iam inchoaverat — tempestivo tempore Italiae episcopos intentos fecit ad problema de dioecesium recognitione in Italia.

Postea, iussu Summi Pontificis Pauli VI fel. rec., haec eadem Congregatio, communi consilio agens cum Conferentia Episcopali Italiae, eiusdemque actuosa fruens cooperatione, abhinc plusquam viginti annos gradatim ac progredienti ratione opus suscepit novo ordine disponendi dioeceses Italiae, quae communi hominum opinione nimis multae censentur neque omnes satis pollent vigore ob territorii, incolarum numeri et pastoralis instructus exiguitatem. Quo in opere absolviendo hoc semper fuit propositum, ut in unaquaque dioecesi magis perspicua natura Ecclesiae pateret, atque episcopus apte et efficaciter omnia sua munera explere posset, prout religiosae, spirituales ac morales necessitates, necnon societatis et culturae mutationes, quae hodie in cursu sunt, magis magisque postulant.

Directoriae normae clare a Concilio impertitae de dioecesium recognitione; indicia atque elementa apta ad actionem pastorem aestimandam ab episcopis supeditata quibus plurium dioecesium regimen commissum est; itemque petitiones a variis partibus Sanctae Sedi exhibitae ut arctiori adhuc unitati talium dioecesium consuleret, immo etiam plenae earundem unioni: haec omnia causa fuerunt, cur profundiori investigationi huiusmodi problema subiectum sit; ad quod quidem rite expendendum, adiutricem contulerunt operam Consilium pro Publicis Ecclesiae Negotiis, Nuntiatum Apostolica in Italia et Conferentia Episcopalis huius nationis.

Quod autem effecit ut haec studia adhuc magis urgent atque opportuna evaderent, vis legis fuit die 3 iunii 1985 normis tributa, quae recentioribus Pactis initis inter Sanctam Sedem et Gubernium Italicum continentur; quibus quidem normis statuitur hinc « Circumscriptionem dioecesium (...) ab auctoritate ecclesiastica libere constitui » (art. 3/1 Pactorum diei 18 februarii 1984); illinc vero dioeceses iure canonico constitutas adipisci posse, iuridicam personalitatem in iure civili italico (cf. art. 29 Normarum quae approbatae sunt per Protocolum diei 15 novembris 1984).

Horum omnium laborum conclusiones subiectae sunt iudicio Summi Pontificis Ioannis Pauli II, qui in Audientia diei 27 septembris anni 1986 criteria adhibita approbavit atque Congregationi pro Episcopis speciales facultates contulit, ut procedere possit ad ea exsequenda, quae proposita sunt, et ad adimplenda quae necessaria videantur.

Vi criterii generalis, quo statuitur ut in unum coalescant circumscriptiones ecclesiasticae usque adhuc pastorali curae unius Episcopi commissae, etiam pro dioecibus unitis Melphictensi, Iuvenacensi, Terlitiensi et Rubensi Congregatio pro Episcopis praesenti Decreto plenam earum unionem decernit.

1) Dioecesis nova hac structura praedita sedem habebit in urbe Melphictensi, ubi hodierna Ecclesia Cathedralis proprium hunc titulum servat.

2) Denominatio dioecesis haec erit « Dioecesis Melphictensis-Rubensis-Iuvenacensis-Terlitiensis ».

3) Hodiernae Ecclesiae Cathedrales urbium Rubensis, Iuvenacensis et Terlitiensis titulum sument Concathedralium, in memoriam earum inclitarum et veterum traditionum.

4) Unicum habebitur Capitulum Cathedrale, quod quidem erit Capitulum Ecclesiae Cathedralis sedis episcopalis.

Capitula autem Ecclesiarum Cathedralium aliarum dioecesium plene unitarum nomina sument Capitulorum Concathedralium.

5) Pariter unica erit Curia Episcopalis, itemque Tribunal ecclesiasticum, Seminarium, Collegium Consultorum, Consilium Presbyterale, Consilium Pastorale, Institutum clericorum sustentationi praepositum, organa apostolatus et alia quaelibet instituta dioecesana, quae vigenti iure canonico praevidentur, facta Episcopo potestate amovendi a sede dioecesis et alio transferendi nonnulla officia administrativa.

6) Sancti Patroni singularum dioecesium, quae in unum coalescunt, colentur Patroni novae dioecesis.

7) Sacerdotes et diaconi, qui hucusque uni ex dioecibus unitis incardinati erant, posthac incardinati censentur novae dioecesi quae ex unione orta est.

8) Nova circumscriptio ecclesiastica in territorio suo includet et comprehendet territoria, quae ad unamquamque dioecesim unitam hodie pertinent.

9) Una cum territorio paroeciarum, quae hucusque pertinebant ad singulas dioeceses unitas, censentur annexa novae ecclesiasticae circumscriptioni etiam instituta ecclesiastica cum suis bonis atque iuribus quae ad


ipsa quoque modo spectent, ad normam can. 121 vigentis Codicis Iuris Canonici.


Pater ac Pastor in regimine dioecesis esse perget Exc.mus ac Rev.mus Dominus Antonius Bello, Episcopus Melphictensis-Rubensis-Iuvenacensis-Terlitiensis, cui Congregatio pro Episcopis confert mandatum ad exitum perducendi executionem praedictarum dispositionum cum necessariis omnibus facultatibus.

Expleto mandato, idem Exc.mus Praesul documenta rediget, quae ad eandem Congregationem authentico exemplari quam primum transmittenda curabit, quibuslibet contrariis non obstantibus.

Ipsae praeterea omnia in sua luce ponere studebit, ut inita provisio, recte intellecta quoad veram suam significationem, ab omnibus accipiatur sereno animo ac prompto dandae operae ut, quemadmodum aequum est, nova dioecesis reapse communitas evadat ad Regnum Dei in vitae actionem traducendum idemque propagandum magis magisque intenta.

Datum Romae, ex Aedibus Congregationis pro Episcopis, die 30 mensis septembris anno 1986.

  
✠ BERNARDINUS Card. GANTIN  
*Praefectus*

+ 

✠ LUCAS MOREIRA NEVES, O.P.  
Archiepiscopus tit. Feraditanus Maior  
*a secretis*